

四庫全書

史部

欽定四庫全書

史部

欽定八旗通志卷

一百五十二至
一百五十三

欽定四庫全書

欽定八旗通志卷一百五十二

人物志三十二

大臣傳十八

滿洲正黃旗六

圖理琛

貝和諾

查克丹

覺羅滿保

瑪拉

素

圖 托特

定壽

拉布敦

圖理琛

圖理琛滿洲正黃旗人姓阿顏覺羅康熙二十五

年由監生考授內閣中書三十六年轉中書科掌

印中書尋遷內閣侍讀四十一年監督蕪湖關稅
務四十二年充禮部牛羊羣總管四十四年以缺
牲被控革職五十一年四月

特命復職出使土爾扈特初土爾扈特汗阿玉奇從子阿
喇布珠爾嘗假道準噶爾赴西藏謁達賴喇嘛已
而準噶爾台吉策妄阿喇布坦與阿玉奇構怨阿
喇布珠爾不得歸請內屬

詔封貝子

賜牧嘉峪關外黨色爾騰嗣阿玉奇遣使薩穆坦入貢
上憫阿喇布珠爾欲遣歸至是

命圖理琛偕侍讀學士殷扎納卽中納顏齋

敕往諭假道俄羅斯五月圖理琛等自京起行七月達俄

羅斯境駐楚庫栢興以假道故俟其國察罕汗信

五十二年正月信至始行由烏的栢興越栢海爾

湖而北抵厄爾庫其駐托波爾之噶噶林遺屬博

爾科泥來迎噶噶林者彼國所稱總營也圖理琛

等欲行博爾科泥言噶噶林令迎天使由水路行而昂噶拉河水未泮請駐候之五月由昂噶拉河乘舟抵伊聶謝柏興登陸閏五月抵麻科斯科復乘舟由揭的河順流而行所經者曰那里穆柏興蘇爾呼特柏興薩瑪爾斯科狄穆演斯科七月至托波爾噶噶林名馬提飛費多里魚赤者迎至署留八日仍遣博爾科泥護之行抵鴉班沁登陸由費耶爾和土爾斯科越佛落克嶺抵索里喀穆斯

科以路寧守凍十月始行所經者曰改郭羅多
黑林諾付喀山西穆必爾斯科十一月至薩拉托
付是為俄羅斯與土爾扈特界水自東北來折而
南俄羅斯呼為佛爾格土爾扈特則呼為額濟勒
阿玉竒汗駐牧地曰瑪努托海距此十日程以雪
盛不能行五十三年四月阿玉竒遣台吉偉徵等來
迎五月圖理琛等渡額濟勒河喇喇布珠爾之父
納扎爾瑪穆特遣人獻馬却之六月朔至瑪努托

海阿玉奇擇吉聽宣

敕我使語之曰阿喇布珠爾已賜爵優養欲遣歸爾牧以策妄阿喇布坦惡爾恐戕之爾若欲令阿喇布珠爾歸當自俄羅斯來迎阿玉奇曰我雖外夷然冠服與中國同俄羅斯乃嗜欲不同言語不通之國也天使歸經其國當察其情俄羅斯若以往來數故不假道則我無由入貢矣阿喇布珠爾荷

厚恩與歸土爾扈特等復何疑慮於是阿玉奇及納扎爾

瑪穆特等各贈馬及方物圖理琛等以越境無私
交却不受阿玉竒待之有隆禮留十四日筵宴不
絕復附表奏謝圖理琛等遂行由舊路歸俄羅斯
遣護如初五十四年三月還京是役也往返三載
餘經行數萬里蓋土爾扈特為俄羅斯所隔遠阻
聲教而俄羅斯又故導我使紆道行圖理琛等自
奉使及反

命無辱焉既歸圖理琛撰異域錄首冠輿圖次為行記一

卷呈

覽

上嘉悅授兵部員外郎阿喇布珠爾亦遂留牧黨色爾騰
不復遣再傳至其子丹忠於雍正九年遷牧額濟
內河四月圖理琛遷郎中雍正元年七月

命赴廣東盤查藩庫九月即擢廣東布政使三年正月調
陝西布政使四月署陝西巡撫七月實授九月疏
言西安延安兩府地廣事繁請改商州同州華州

乾州邠州耀州廊州葭州綏德州俱為直隸州分
西安府屬之鎮安雒南山陽商南四縣隸商州朝
邑郃陽澄城韓城四縣隸同州華陰蒲城二縣隸
華州武功永壽二縣隸乾州三水淳化長武三縣
隸邠州同官白水二縣隸耀州延安府屬之雒川
中部宜君三縣隸廊州吳堡神木府谷三縣隸葭
州米脂清澗二縣隸綏德州部議從之四年四月
奏請支庫銀六萬兩採買芻豆為西安兵丁備用

諭曰圖理琛向任廣東布政使時密奏不准官兵預支俸
餉廣東及各省原有歲暮預支兩月錢糧之例伊亦固
執不行以致兵丁度歲艱窘怨謗繁興撫臣年希堯強
之而後給發隨經具摺奏聞比時朕恐圖理琛在廣東
未必相安故改調西安旋有西安巡撫員缺遂爾擢用
今圖理琛奏請預支銀兩採買豆草以備用是圖理琛
為布政使時則但知有錢糧而不知有兵丁今為巡撫
又但知邀兵弁之歡心而不復計錢糧之出納身為大

臣乃偏執已私遂至前後大相矛盾况雍正元年題定兵馬豆草折銀之例悉照酌中之價若遇豐年價賤兵丁可得餘銀若遇歉年價貴許該管上司題請增給是兵丁原無歉年匱乏之慮今西安兵丁之豆草請預買以備用則他處兵丁之豆草獨不當預備乎圖理琛身在西安即欲加厚於西安旗標兵丁豈此外兵丁皆不當蒙惠乎西安總統滿洲兵馬乃將軍延信專責圖理琛即謂有益於兵丁亦當與延信同奏今妄憑臆見獨

自敷陳顯欲侵將軍之職掌著傳旨申飭五月保送遊

擊查爾扈

諭曰嘗見滿洲為上司則以滿洲為可信任漢人為上司則以漢人為可信任漢軍為上司則以漢軍為可信任不思身為大臣管轄之人滿漢俱有一有偏向則諸事皆不得其平何以服人心而舉庶務前令陝西督撫提臣各保遊擊一員守備一員送京引見朕意以陝西武弁可用者甚多而征討桌子山等處又多効力有功之人地方大

臣當從公保薦以副朕留心人材之意乃圖理琛於遊擊內將查爾扈保送前來查爾扈曾在乾清門侍衛行走用為陝西撫標遊擊滿洲在陝西為綠旗武官者只有查爾扈一人而圖理琛即將伊保舉豈此外遂無可保舉者乎且查爾扈係朕深知熟識之人又何必進京引見着即令回任又潼關修造滿兵房屋延信圖理琛特差旗員四人前往監造若云滿洲房屋漢官監造未必合宜何妨指示規模令其照式為之而必欲差委滿

洲謂其不致侵蝕浮冒是明以漢人為不可信用而以滿洲為可信用即有意偏向之明驗矣著交與延信圖理琛不時稽查若所差旗員不善辦理或有侵蝕浮冒或在地地方生事滋擾朕少有所聞定將延信圖理琛一併從重議處十月疏言靖邊定邊二所距保安塞膚施三縣甚遠請將靖邊所地丁錢糧歸附近之鎮樂寧塞二堡令靖邊經歷司徵收定邊所地丁錢糧歸附近之磚井鹽場二堡令定邊縣丞徵收下部

議行尋遷兵部右侍郎五年四月轉左侍郎六月
調吏部右侍郎八月偕喀爾喀郡王額駙策凌等
往定喀爾喀與俄羅斯界十二月仍調兵部右侍
郎六年三月追議前定界時與俄羅斯使臣薩瓦
鳴礮謝天私立木牌於定界所旋焚之擅納俄羅
斯貿易人入界又前任陝西巡撫時將天下兵數
繕摺私給延信

命逮治鞠實擬斬十一月

宥免十二月

命往築扎克拜達里克城十三年九月

今上御極授內閣學士十二月授工部侍郎乾隆元年諭曰圖理琛年老昏庸不勝工部侍郎之任著仍為內

閣學士二年乞休

允之五年卒

貝和諾

貝和諾滿洲正黃旗人姓富察尚書濟席哈之孫

聖祖仁皇帝康熙二十七年由工部筆帖式授戶部主事

洵遷兵部員外郎戶部郎中兼佐領三十四年十一月遷兵部督捕右理事官尋遷大理寺卿三十五年二月奉

命往山東經理開河五月總漕桑額奏漕船盡過濟寧較上年早月餘皆仰賴

睿慮周詳豫遣卿臣貝和諾封閘蓄水啟閉以時六月貝和諾還奏漕船陸續抵通

上曰遣官有並漕運自後可倣行之七月遷都察院左副

都御史三十六年正月擢戶部侍郎十一月禮部

奏朝鮮國王李焯以旱澇頻仍廩庾空乏八路流

離請開市義州中江貿穀得

旨覽奏朝鮮乞糴朕心深為憫惻可賞給米一萬石令侍

郎陶岱督運前往再運二萬石令侍郎貝和諾往中江

監視貿易三十七年五月事竣李焯表謝八路生靈賴

得全活十二月授陝西巡撫二十八年六月疏言

陝省兵民被

恩撫恤無微不至准開捐事例原期積貯充實緩急足恃
臣抵任後計原報捐納米麥撥支兵糧等項應存
一百七十七萬八千九百一十九石今省倉及各
州縣實存十七萬一千二百石有奇虧缺一百六
十萬七千六百八十六石不敢不據實陳明

上命尚書富拉塔張鵬翮往同貝和諾察核三十九年正
月覆秦原捐米麥分貯長安永壽華陰等縣因防

霉爛出糶三十八萬二千八百九十餘石現已糶
補足數此外俱係報捐之官生掛欠今亦陸續完
納尚少一百九萬九千八百餘石應開造報捐官
生姓名及掛欠實數達部俟完納後方准陞選考
試仍勒限嚴催倘逾限不完并議處經手各官事
下部議從之三月疏言漢興道所轄界連楚蜀幅
幘遼濶最為緊要請以議裁之神木道李杰就近
調補疏入

諭部臣曰神木地方朕前統領大兵經過見田畝瘠薄人
民稀少最為寒苦然逼近蒙古實屬要地前貝和諾奏
裁神木道今又以現任道員李杰題補漢興道是為李
杰規避寒苦希調善地其嚴加議處部議降三級調用
得

旨從寬留任五月調四川巡撫十一月

命督理進勦爐蠻糧餉四十一年四月疏言打箭爐駐劄
官兵需用糧餉宜豫為接濟請撥隣省銀十萬兩

來川應期給發扣捐本省知縣以上各官俸銀補
項下部議如所請

上曰四川極邊之地官員度日維艱免其扣捐俸銀補項
六月疏言打箭爐木鴉等處番民一萬九千餘戶
歸順應添設安撫使五員副使五員土百戶四十
五員以專管轄又疏言邊末藉茶資生向來邊民
造辦賞番茶包之外聽其以所餘運爐貿易恐有
營官撓阻請給天全土司官引四千道副土司官

引一千六百道定額徵課閏六月疏言各省重犯
招冊久經達部其秋審時令造全招又摘造畧節
事屬繁複請嗣後秋審以原供及督撫看語敘入
冊內停止繁複造送十一月疏言化林松潘均屬
邊地素不產米向來化林設兵尚少故照建昌各
營例折給今兵衆餉多米價騰貴請照松潘之例
增價給發四十二年正月疏言各省教職每學二
員獨川省有五十七學各設一員請於威茂等州

啟州等府會川等衛添設訓導一溫江等縣添設
教諭一九姓司學添設教授一三月疏言前撫臣
于養志題明松潘小河疊溪三處收捐米穀分貯
備用自三十八年迄今松潘捐一千七百餘石其
小河疊溪以道路險峻輸運維艱罕赴捐納請停
止收貯例四十三年正月疏言川省行鹽潼川中
江山路崎嶇艱於陸運額引壅滯難銷惟冰江小
溪水運可通請增給水引商民交便諸疏並下部

議行二月內遷兵部侍郎十四年五月擢雲貴
總督四十五年六月疏言新陞廣東布政使之雲
南按察使劉蔭樞老成練達清廉愛民今現署雲
南布政使請即以留補得

旨如所請九月擒獲逆匪李天極王枝葉等於富民縣之
響音哨山李天極者昆明人冒入廣通縣學與臨安
府生員朱六非造為符讖以師宗州生員之子魏
枝葉流蕩不歸誘之詭託明桂王之孫陽以王姓

相呼遇開化府賣藥人楊春榮蒙自縣談相人張
平山富民縣演伎人楊起鳳同謀不軌偽稱文興
三年以鉛摹桂王之寶及諸偽印散播總制大將
軍副總兵都督僉事等偽劄願入黨者改装蓬頭
僧或長髮道士潛期先掠廣南次掠開化由蒙自
劫省城為督標弁兵首報先後擒獲李天極王枝
葉楊春榮楊起鳳張平山朱六非請

旨立斬餘黨流徙數人首報者獎賞如例四十六年十月

疏陳金銀銅錫等礦廠歲徵實數戶部以未較舊額加增議駁

上曰雲南礦稅一年徵銀八萬兩零用撥兵餉數亦不少若又令加增有不致累民乎著照原題議給四十九年九月內遷禮部尚書五十年十月以山西太原流匪陳四等六十餘人詭稱赴雲南開墾攜婦女乘馬羸由陝西湖廣至貴陽貝和諾前任總督得布政使張建績牒報不即察究僅令咨回原籍降一

級調用十一月授

盛京工部侍郎五十七年十月復禮部尚書五十九年正月以老乞休得

旨慰留六十年二月卒於官年七十有五子瑪拉自有傳

查克丹

查克丹滿洲正黃旗人姓博爾濟吉特曾祖恩格德爾和碩額駙追封三等奉義公有傳祖索爾哈固倫額駙授三等輕車都尉父色楞頭等侍衛襲

世職兼佐領康熙三十年查克丹由官學生襲三等輕車都尉三十八年選侍衛四十三年襲佐領尋授散秩大臣六十年授鑲藍旗蒙古副都統六十一年遷正黃旗護軍統領雍正元年授火器營大臣二年擢鑲藍旗蒙古都統三年

命赴甘州署將軍事先是準噶爾貢使至甘州左衛守備馬德仁右衛守備王三捷供應失時查克丹抵任知其事疏

聞並陳由花馬池至甘州沿途驛馬疲瘦狀

詔總督年羹堯等嚴飭所屬管驛官加意養馬罰德仁三

捷倖四年旋京仍任正黃旗護軍統領五年正月

擢正黃旗滿洲都統十月授議政大臣尋

命率班兵赴北路軍營九年振武將軍順承親王錫保由

北路討準噶爾

命查克丹叅贊軍務授內大臣十年準噶爾小策凌敦多

卜謀掠喀爾喀查克丹偕喀爾喀親王丹津多爾

濟額駙策凌等赴奔博圖山偵禦未至賊衆越察罕瘦爾軍營入掠杭愛山因反旆尾追至額爾德尼昭賊衆逼鄂爾坤河而陣為負嵎計查克丹等督兵奮擊大敗之餘賊負傷竄推河復追至察罕托輝斬馘幾盡捷

聞敘功授雲騎尉併原襲世職為二等輕車都尉時順承親王代傅爾丹為靖遠大將軍仍

命查克丹叅贊軍務十二年調鑲藍旗滿洲都統十三年

自軍營還調正紅旗蒙古都統乾隆四年五月以病乞休
優詔弗允十月復籲請

諭曰卿才品優長簡任都統內大臣正資料理前因患
病告休朕降旨照舊供職今覽奏情詞懇切著以原
品休致十一年九月卒

賜祭葬如例謚敏恪子和爾敦官副都統龍衣二等輕車
都尉三十一年卒停龍衣

覺羅滿保

覺羅滿保滿洲正黃旗人康熙三十三年進士改庶吉士授檢討三十八年充浙江鄉試副考官尋充

日講起居注官四十年遷侍講四十一年充山東鄉試副考官四十五年授國子監祭酒四十八年擢內閣學士充

經筵講官五十年十一月授福建巡撫五十二年正月疏言福州府屬之閩縣福清長樂連江羅源興

化府屬之莆田泉州府屬之晉江惠安同安南安
漳州府屬之龍溪漳浦海澄詔安福寧州與所屬
之寧德共十六州縣皆瀕海要地必得諳練庶務
素著才能者治之而後人地相宜嗣後遇缺請於
直隸各省卓異官內

特簡調授三年俸滿陞用疏下吏部議御史璩廷祐疏言
五方風土不齊秦晉燕趙之治未必可治閩越驟
易其處官與民不相習安能遽展其才迨稍稍諳

練已屆三年又陞遷他往於地方無益且懸缺久
待事多貽誤滿保所奏未可為例不如就本省擇
員調補疏亦下吏部部議滿保所指十六州縣非
海外烟瘴地應循例歸部選

上諭大學士等曰督撫為地方得人起見懇切陳奏理所
應然御史言其未可為例似皆由卓異官不願往海濱
苦地囑其於未經部覆之先條奏自然部議不准如此
則權歸科道是明季惡習漸不可長其閩省十六州縣

當揀選發往問九卿詹事科道再奏尋覆奏璩廷祐愚
昧不達事宜應如滿保奏即行揀選卓異官引

見補授發往五十四年十一月擢福建浙江總督五十六

年十二月疏言鹿耳門為臺灣咽喉澎湖為廈門

藩衛安平鎮為水師三營重地及海洋各口岸分

別極衝次衝修築礮臺擇地建造營房巡防分守

又言海船出入宜取船戶澳甲保結限以人數並

禁漁船私載米糧軍器其臺灣商船往來令毋徑

趨大洋志赴廈門給照驗行除泊港貿易貨物照
例納稅外其往江南浙江貿易者仍在江浙海關
納稅免其重徵五十七年四月疏言福建駐防兵
孳生衆多有壯丁未得披甲者二千餘名請挑選
撥補綠旗各標營缺食糧又言淡水鷄籠山為臺
灣北界三面濱海西南夷舶往琉球日本者皆望
此山為準的且澳港深濶可泊巨艦百餘內為肩
豆門沃野百里番社衆多請增置淡水營設官駐

防以扼臺灣之尾五十九年五月同浙江巡撫朱
軾疏陳修築海塘六事一海寧縣老鹽倉北岸石
塘自蒲爾堍至姚家堰凡築隄一千三百四十丈
一石塘高二丈每丈累石十層塘外聚漲沙擁護
隄根一開中小壑淤沙使復江海故道一築上虞
縣夏蓋山石塘一千七百九十丈防南岸潮患一
調委經理各官以專責成一江海潮神加贈封號
令有司春秋致祭諸疏俱下部議行六十年四月

奸民朱一貴自稱明裔偽號中興王下大元帥
聚眾倡亂於鳳山縣之姜園地遂陷臺灣府治總兵
歐陽凱副將許雲叅將羅萬倉遊擊游崇功等率
兵勦賊並遇害五月丁卯滿保聞報檄調水陸兵
俱赴澎湖撥運省倉及上游州縣各倉穀數萬石
濟軍食自率標兵至廈門六月丙午提督施世驄
與南澳總兵藍廷珍進征鹿耳門敗賊安平鎮壬
子克復臺灣府治乙卯滿保於廈門奉到

上頒招撫臺灣衆民

硃筆諭旨曰朕思爾等俱係內地之民非賊寇可比或為
飢寒所迫或因不肖官員刻剝遂致一二匪類倡誘衆
人殺害官兵情知罪不能免乃妄行強抗其實與衆何
涉今若遽行征勦朕心大有不忍故諭總督滿保令其
暫停進兵爾等若即就撫自原諒爾等之罪倘執迷不
悟則遣大兵圍勦俱成灰燼矣臺灣只一海島四面貨
物俱不能到本地所產不敷所用止賴閩省錢糧養生

前海賊佔據六十餘年猶且勦服不遺餘孽今匪類數人亦何能為耶諭旨到時即將困迫情由訴明改惡歸正仍皆朕之赤子朕知此事非爾等本願必有不得已苦情意謂與其坐以待斃不如苟且偷生因而肆行擄掠原其致此之罪俱在不肖官員爾等俱係朕歷年贍養良民朕不忍勦除故暫停進兵若總督提督總兵官統領大兵圍勦爾等安能支持此旨一到諒必就撫毋得執迷不悟妄自取死於是滿保令興泉道陶範率都

司守備等官往臺灣傳宣

上旨閏六月丙寅諸羅縣溝尾莊民人楊旭等密約壯丁
六百餘人佯與賊附宰牲結盟誘朱一貴等夜飲
達旦俟醉臥收藏其鬪械四面合圍生擒朱一貴
及其黨十二人獻施世驃軍前世驃與滿保先後
入奏檻送朱一貴等至京磔誅於市滿保疏言賊
匪蠢動時惟淡水營守備陳策鼓勵兵民堅守汛
地擒殺亂民苑景文等以待大兵進援協同勦撫

寔為奮力効忠

上遂擢陳策為臺灣總兵官又疏言前者三月間鳳山縣民在檳榔林地方演劇羣飲知府王珍縱役需索妄拿多人朱一貴乘機倡亂於四月十九日樹旗聚眾臺廈道梁文煊及所屬官員一無備禦退回澎湖應革職提問其戴罪効力之遊擊張彥賢等應解任審擬得

旨如所請行八月以臺灣颶風大作入奏

諭曰臺灣地方官平日但知肥己刻剝小民激變人心及
大兵進剿殺戮之氣上干天和颶颶陡發倒塌房屋淹
沒船隻傷損人民此皆不肖有司貪殘所致也今宜速
行賑卹以慰兆民

世宗憲皇帝雍正元年八月兵部議臺灣陣亡總兵歐陽
凱副將許雲等予加贈廕卹征勦有功之提督施
世驃總兵藍廷珍等予世職敘錄有差滿保為封
疆大吏致匪類竊發失陷城池其聞變即赴廈門

調度有方應以功抵罪得

旨滿保雖有失陷地方之罪但一聞事發即親往廈門撫慰衆心遵依

皇考指示調遣官兵七日之內克復臺灣著兼兵部尚書職銜先是上杭縣奸民溫上貴往臺灣從朱一貴得偽元帥劄付及木刻偽印仍還上杭將煽誘其鄉人從賊聞朱一貴伏誅遂竄江西潛結棚匪數百人謀掠萬載縣城知縣施昭庭調集鄉勇同營汛官

兵勦捕擊斃三百餘人。生擒溫上貴與其黨十數人。並正法。於是大學士白潢尚書張廷玉各條奏禁戢棚匪策。

勅所在督撫詳議。滿保疏言。閩浙兩省棚民以種麻種靛種煙造紙燒炭煽鐵等項為業。奸民不一。令地隣出保結五棚長連環互結。若有為匪不法事踪跡可疑人而弗首報者。依律連坐。則自不敢容隱。州縣官於農隙時徧履各棚稽查。如始勤終怠約束。

不嚴即劾罷之浙江之鄞縣奉化等二十七縣福建之閩縣龍巖等四十州縣皆有棚民宜如沿海州縣例於通省內揀選才守兼優之員題請調補則治法與治人咸收寔效矣疏下部議以福建通計六十州縣無棚民而又非沿海者僅十三縣難供四十七州縣之選補其約束事宜及浙江二十七縣揀調應如所奏行議上得

旨嗣後凡有棚民之閩省州縣吏部將所出之缺於進呈

月官履歷時具奏朕於月官內揀補發往二年十一月
上諭大學士等曰凡督撫大吏任封疆之寄其所陳奏皆
有關國計民生故於本章之外准用奏摺以本章所不
能盡者則奏摺可以詳陳而朕諭旨所不能盡者亦皆
於奏摺中詳悉批示以定行止此皆機密緊要之事不
可輕洩是以朕將內製皮匣發于諸臣令其封鎖奏達
蓋取堅固慎密他人不敢私開也去年初行時諸臣尚
皆敬慎近聞浙閩總督滿保山西巡撫諾岷等皆有信

託之人在京私看奏摺及朕所批密旨朕待諸臣推心置腹事事至誠言無不盡諸臣正當仰體朕懷謹慎周密凡有摺奏據理敷陳候朕裁奪何必委託其子弟親戚探聽消息以致洩露密摺藉生種種弊端此皆由諸臣不能自信又不能信朕其存心如此則密摺又何益乎嗣後停其摺奏有事只照例具本其餘督撫大吏奏摺若有子弟親朋在京私開者一經發覺朕必將私開之人正法督撫等照溺職例革職決不寬貸滿保尋疏

言摺奏不能慎密臣罪實無可寬蒙

恩不即罷斥仍任海疆重寄遇有緊要之事必得其摺奏請
聖訓方可料理無悞得

旨滿保既知過懇切奏請准照常摺奏三年九月卒於官
遺疏言新任巡撫毛文銓未至總督印信不便遠
送謹交福州將軍宜兆熊署理并留解任巡撫黃
國材暫緩起程如舊辦理得

旨滿保向來居官雖無廉介之稱然才幹優長盡心辦事

整飭營伍經理海疆實為稱職昔年臺灣一事雖不能
消弭於未然而能於七日之內即行克復功過足以相
抵朕即位以來時加教誨滿保亦知奮勵矢志廉潔及
至抱病沈篤之際尚能留心地方將黃國材留閩以待
新任巡撫並將總督印務交與將軍宜兆熊其辦理俱
屬得體今聞溘逝朕心深為軫惻下部察例議卹時尚
書隆科多獲罪法司鞫訊其家人得滿保餽金三
百兩狀及禮部議卹疏入

上留中久之始發出

諭曰滿保居官賢否衆論不一是以賜卹之典朕未即定今細加訪察知其居官甚屬平常於吏治民生毫無裨益但諂媚隆科多年羹堯而已不必賜卹與諡

瑪拉

瑪拉滿洲正黃旗人姓富察康熙三十六年襲佐領四十三年遷護軍叅領雍正元年三月授鑲藍旗蒙古副都統十一月調本旗滿洲副都統二年

二月擢刑部侍郎十一月以本內誤絞為斬降三等侍衛兼佐領四年授正紅旗滿洲副都統五年正月奉使西藏先是副都統宗室鄂齋疏報西藏情形言達賴喇嘛年幼總理藏務貝子康濟鼐恃其勲績輕視諸噶卜倫衆恨之固山貝子阿爾布巴乘隙與隆布鼐扎爾鼐為黨煽搆事端致達賴喇嘛與康濟鼐不和請予隆布鼐扎爾鼐噶卜倫原銜罷其職掌以翦阿爾布巴羽翼

上因命瑪拉偕侍讀學士僧格往

諭達賴喇嘛康濟鼐和衷共事

賞銀一千兩總理西藏事務十月阿爾布巴戕康濟鼐以

兵圍後藏貝勒頗羅鼐至阿里頗羅鼐截殺其衆

遂領兵往剿阿爾布巴

上以瑪拉在藏恐為阿爾布巴所惑從中講和以致頗羅

鼐受害

遣學士班第密

諭機宜六年七月頗羅篤自藩玉口至喀巴先擊喀木卡
倫與隆布鼐遇是夜斥候兵集遂抵西藏瑪拉等
趨布達拉護達賴喇嘛還藏各廟喇嘛擒阿爾布
巴隆布篤扎爾篤以獻頗羅篤繫送瑪拉所瑪拉
等鞠謀殺康濟篤狀得實磔阿爾布巴斬隆布鼐
扎爾篤逆孛緣坐十月瑪拉等以達賴喇嘛入隊
中率西安滿洲兵四百固原兵五百四川兵百駐
察木多應援七年二月調鑲藍旗滿洲副都統留

駐裏塘護達賴喇嘛六月

賞銀二千兩八年擢正黃旗護軍統領九年

上念瑪拉在藏年久以副都統青保代之

賞銀一千兩

命將防衛兵丁酌量帶回十月瑪拉偕額外內閣學士僧

格疏報班禪額爾德尼貝勒頗羅鼐遣使齎牛羊

酥麵餉大軍

諭曰瑪拉僧格將所送之物核價充裕給與銀兩並傳諭

伊等朕遣兵在藏駐劄特為衆唐古忒防守使之寧謐
豈有絲毫貽累之理今所送諸物勢必在伊屬下攤取
未免滋擾且我兵糧餉並不缺乏此番給還銀兩並非
外視爾等也可傳諭唐古忒咸悉朕意十一月瑪拉請
給貝勒頗羅萬印

詔廷議如所請十二月擢工部尚書兼正紅旗滿洲都統
十年三月由藏回京因言番子等仰賴

皇恩各安生理得爾格特部向皆恭順自隸內地差務勤

慎

上命給得爾格特宣慰司銜七月

上以瑪拉不曉部務該旗事件亦多昏憤率意著革職以

佐頌在軍需處章京行走十一年正月

諭曰原任都統瑪拉在藏辦事熟諳彼處情形著以副都
統銜前往西藏辦事三月

上諭軍機大臣曰西藏駐劄弁兵本為防護唐古忒以防
準噶爾賊夷侵犯邇來賊夷大敗徒步奔逃力蹙勢窮

不能遠涉且頗羅萬輸誠効力唐古忒兵亦較前氣壯
今藏地無事兵丁多集米穀錢糧雖給自內地而唐古
忒人等不免解送之勞朕意留兵數百餘盡撤回青保
瑪拉苗壽著總理藏務應撤兵丁詳議具奏瑪拉等合
疏言駐藏四川兵二千應留五百餘撤回三年後
仍撥四川兵代之雲南兵一千本為援藏設今亦
量撤五百三年更代如四川例

上從之乾隆元年瑪拉等疏言統轄喀喇烏蘇兵扎薩克

頭等台吉那顏和碩齊卒臣與貝勒頗羅萬議請
以其次子頭等台吉珠密納木扎爾兼轄以其弟
塞臣哈什哈襲扎薩克頭等台吉廷議允行八月
卒

賜祭葬如例

素圖

素圖滿洲正黃旗人姓富察三等男斐雅思哈之
孫都統素丹之子也

聖祖仁皇帝康熙四十年素丹有疾所襲父爵減去

恩詔晉加者改為二等輕車都尉以素圖襲初名福列既襲職改今名任護軍叅領五十四年厄魯特策妄阿喇布坦侵掠哈密北境素圖率烏拉兵隨都統新泰屯備阿爾台五十八年十二月

詔於駐守阿爾台二萬兵內選一萬五千分道進征明年二月素圖隨征西將軍奇里德自布勒罕潛師深入擒斬山谷伏兵四百餘人七月抵鏗額爾河其宰

桑色布騰等據山拒守我師奮擊賊大敗退駐山麓諭降之色布騰率二千餘人來歸明年移駐巴里坤尋赴土魯番督視築城種地

世宗憲皇帝雍正元年隨副將軍阿喇納駐布隆吉爾二年三月厄魯特部阿喇布坦及素巴泰等襲我臺站素圖偕總兵孫繼宗擊敗之賊遁去復追敗其衆乃築城布隆吉爾為駐防邊界十月復隨副都統達萬追剿羅卜藏丹津至花海子擒丹津台吉

及其妻索諾木子袞布并撫定噶斯台吉等三十
三人

上以口外水凍草枯之候官兵奮勇遠征

特旨嘉獎十一月擢寧夏左翼副都統時其父素丹為寧

夏將軍

上念素丹年老

命素圖協理將軍事務五年奉

詔率西安滿洲兵二千赴靖邊大將軍傅爾丹軍營七年

授叅贊大臣八年

召素圖隨傳爾丹入

覲

授方略時策妄阿喇布坦之子噶爾丹策凌與羅卜藏丹

津同謀濟惡

上命寧遠大將軍岳鍾琪由西路勦擊而素圖同傳爾丹
領兵攻其北路九年六月素圖偕副都統岱豪分
兵三千與賊戰於庫列圖嶺殺賊四百餘翼日賊

兵二萬從高阜來犯我大營素圖會傅爾丹軍夾擊多斬馘時賊據險要我軍議移營至和通呼爾哈諾爾素圖與前鋒統領定壽副都統常祿錫彌賚引兵據山梁東面騎突衝逼我軍分擊殺賊千餘尋為賊圍困素圖力戰歿於陣定壽常祿錫彌賚皆遇害傅爾丹以聞

諭曰朕聞諸臣力戰陣亡痛惻難忍不覺淚下其勅議卹於是

賜卹如例素圖得騎都尉又一雲騎尉世職合所襲之職
為三等男以子素瑚濟襲

托特

托特滿洲正黃旗人姓佟佳康熙五十三年由筆
帖式授理藩院主事累遷工部郎中雍正元年三
月遷內閣侍讀學士六月擢戶部右侍郎三年五
月調倉場侍郎六月

上念直隸被水災民乏食

命托特等截留漕米二十萬石貯天津倉備賑托特奏地勢卑濕恐沍爛

詔往勘建八月

命撥通倉陳米十萬石運天津十一月以所撥米不堪用訓飭之四年十一月奏請於萬安倉開東門二增造船八

水運入倉每年疏濬河道部議從之十二月奏言通州大西中南兩倉所儲稜粟米足敷數十年用致廩座不敷新糧露積請嗣後間年全放稜米一

次待支用將完仍舊蕪放又言向來押運旗丁每
幫留一人住通州名曰守候需索分肥弊由斯起
嗣後糧艘到通運官造本管旗丁花名冊投坐糧
廳交畢立押回南違者治官弁以疎縱之罪再各
倉例有折價給丁三升八合之項往往勒索遲延
希圖舞弊倉場侍郎察出題叅其應行南追給者
坐糧廳行各糧道照數追給取領狀申報如糧道
有勒索情弊總漕查叅又各漕幫非失風而掛欠

者不得照失風之例止收平米應照當年起運數
於次年搭運均下部議行是月

命兼理戶部侍郎事先是奉

旨修京通各倉工竣五年

上遣大臣等往查得損漏狀

諭曰倉場米石乃國計民命所關顆粒皆當珍惜必厥座
堅完米粟方不至於霉爛朕宵旰勤勞不惜數十萬帑
金創造修整身任倉場之事者自當加意慎重仰副朕

懷乃托特陳守創身任倉場全不實心料理以致倉廩損壞滲漏處至九百二十九座米粟竟有霉爛者並無一語奏聞甚為溺職孔特陳守創俱著革職七年

賞侍郎銜出使俄羅斯八年襲其祖舜古邇岱所遺騎都尉世職十年使回補刑部右侍郎旋轉左兼理工部侍郎事務十一年調工部右侍郎又調戶部右侍郎十三年因左侍郎海望署尚書托特轉左協辦步軍統領事務乾隆三年正月奉天將軍傅第

等劾知府傅賚與城守尉朝哈岱通判圖善會飲
起衅角罵互毆

命托特往審得實朝哈岱圖善俱革職傅賚論杖徒如
律七月遷漕運總督九年奏言本年因濟運河開
兌較遲至渡黃又因清口淤阻途次耽延弁兵等
星夜僱行多費工力仰蒙

恩命令臣加賞獎勞查漕白糧船一百二帮其先渡淮
者並無阻滯無閘水深通起剥甚少無需議給惟

自江西吉安幫至浙江嘉興幫守候二十餘日雇
船剥米用力獨多臣擬將依限抵通全完者正副
旗丁賞銀一兩領運千總四兩協運隨幫二兩仰

副

皇上軫念優卹之至意疏入

報可十一月奏浙江紹興前後二幫漕船因乾隆二年
截漕濟閩減存在次旗丁等已領錢糧部議自乾
隆四年始分三年扣還請將該幫本年應領減半

糧銀抵充乾隆四年應扣之數餘自乾隆五年起
分三年扣完庶運費從容各丁不至拮据從之又
疏言漕運起運例用同知通判以總其成領運隨
幫弁目以分其任立法詳盡迨回空之日丞倅則

借詞引

見任意推延千總則托故完呈有心留滯既不親押回
南又不料理空船銀米以致副丁資斧不給棄船
潛逃或遇淺閣沈溺卽至脫幫遺棄弊端百出請

於起米後令領運千總督同正丁料理回空各項
齊備其應給糧蓆完呈限坐糧廳監督衙門於十
日內給發仍照例給限單飛星趕幫總押丞倅引
見後部臣亦給限單令速赴大幫統於到淮日詳核逾
者即行叅處

允之十二月疏言不法旗丁錢糧到手任意銷糜偶不
敷動輒逃竄即拏獲懲創一二年後更易姓名復
僉管駕故智復萌其故由於已革逃丁無從辨

識以致屢革屢僉誤運蠹漕莫此為甚請嗣後有
犯除依律治罪外仍照旗逃竊盜例面刺逃丁二
字察識既易不能復充似亦懲奸救弊之一法疏

入報

聞四年七月疏言湖廣漕船由水次抵通計四五百里
較他省最遙而行月口糧折銀四錢較他省獨少
且該省米價漸昂非從前定價時可比以故丁力
漸艱伏查行月口糧各省皆有本折二色應將湖

廣省亦照此例其半仍作折色每石折銀四錢半
改本色各照該省兵糧例湖北每石折銀七錢湖
南每石六錢丁力既舒體例亦昭畫一經大學士
等議行十月遷刑部右侍郎九年調補

盛京刑部侍郎十一年以老病乞休

許之二十五年卒子佟起龍襲世職

定壽

定壽滿洲正黃旗人姓赫舍哩父音達蘭襲其兄

奇朗阿三等輕車都尉世職尋卒定壽襲初任三等侍衛授護軍叅領康熙五十五年擢正黃旗蒙古副都統五十六年

命振武將軍傅爾丹由阿爾台一路進剿策妄阿喇布坦定壽同副都統圖喇率

盛京吉林兵一千赴阿爾台尋為軍營前鋒統領擊賊於博囉布爾哈蘇及烏嚕木齊等處屢有斬獲紀功俟事平議敘

世宗憲皇帝雍正二年授鑲藍旗蒙古都統時策妄阿喇布坦遣使納款部議阿爾台駐防兵應移巴里坤於是定壽率之移駐尋奉

諭曰定壽在軍前年久朕欲調回另用其所率移駐之兵令交與將軍富寧安就近派大臣管轄即馳驛來京會部議阿爾台一路茂岱察罕蒐勒諸處應仍派兵駐防遂授定壽為阿爾台駐防將軍

特旨敘前軍功予騎都尉世襲罔替合所襲之職為一等

輕車都尉是年十二月

命巴里坤軍營前鋒統領穆克登為阿爾台駐防將軍定
壽以都統銜叅贊軍務明年授軍營前鋒統領

詔率兵駐守阿爾台山嶺四年振武將軍巴賽奏令定壽
率兵往扎布罕駐防降雪後撤回六年

詔隨穆克登還京定壽奏請仍留察罕蒐勒軍營効力
允之七年策妄阿喇布坦之子噶爾丹策凌率衆犯邊
上授傅爾丹為靖邊大將軍由北路進剿

命定壽以都統銜為軍營前鋒統領八年傅爾丹奏令定壽率兵二千往伊克斯諾爾附近駐防九年六月噶爾丹策凌糾賊三萬來犯傅爾丹偕定壽領兵至扎克賽河獲賊二十餘人訊之詭言賊兵不滿千在察罕哈達遊牧尚隔三日程傅爾丹信其言令定壽率兵一千五百先行而自統兵繼進定壽至庫列圖嶺遇賊數千接戰斬賊四百餘駐營以待傅爾丹既至令定壽移營和通呼爾哈諾爾賊

兵二萬潛伏山谷伺我軍甫移突出分路阻截定
壽擊之所向披靡乘勝深入忽大風驟起雨雹交
加賊并力衝散我軍傷損將弁甚衆遂環逼定壽
圍之數重時定壽已中鳥鎗傷與賊相持竟夜賊
欲生致之乃自刎歿於陣傳爾丹以

聞下部議卹晉世爵三等男

賜祭葬如例入祀昭忠祠其子赫義龍衣因鎔

恩詔所加之職改二等輕車都尉孫扎拉豐阿別有傳

拉布敦

拉布敦滿洲正黃旗人父尚書錫勒達自有傳康熙五十五年拉布敦由閒散襲其叔祖勒爾圖三等輕車都尉世職雍正七年赴北路軍營隨靖邊大將軍傅爾丹勦準噶爾於和通呼爾哈諾爾拉布敦與賊連戰數晝夜斬獲甚衆十年八月隨額駙策凌敗賊於額爾德尼昭十二月授世管佐領十一年查敘軍營超勇人員

賞戴孔雀翎十二年奉

命率兵越阿爾台山偵探十三年保列一等引

見以叅領用乾隆元年補叅領六年二月授鑲紅旗滿

洲副都統三月調正紅旗八年授北路軍營叅贊

大臣九年署定邊左副將軍疏言偵得布爾吉推

河有厄魯特宰桑額勒慎等十餘戶駐牧布延圖

河源有烏梁海得木齊扎木禪等十餘戶駐牧布

爾吉推河在阿爾台山梁外布延圖河源在阿爾

台山梁內均距卡倫不遠現密劄坐卡侍衛等嚴防

詔軍機大臣等議尋議伊等或因避雪來但日久未免生事準噶爾夷使哈柳現在京應諭以守定界毋任意遊牧令還告台吉噶爾丹策凌即撤回從之十年疏言烏梁海得木齊烏爾巴齊等避雪駐牧黃加書魯克距卡倫甚近託爾和烏蘭及布延圖哈瑪爾沙扎海卡倫外皆有準噶爾人嚴飭坐卡

侍衛等小心防範報

閏十一年還京補正白旗滿洲副都統十二年署古北口提督十三年四月駐藏副都統傅清期滿

命拉布敦往代十月

諭曰據拉布敦奏西藏新襲郡王珠爾默特那木扎勒寄知阿里克交易回人等告稱現在準夷內亂伊即嚴飭各卡緊密防守如有準夷來到即送至藏等語藏地關係緊要駐藏大臣凡事最宜查取確實權其

輕重相機辦理毋得稍有滋事藏內不可容留準夷
一人可傳諭拉布敦知之十四年正月還京授工部
左侍郎仍兼正白旗副都統六月兼正藍旗副都
統並署鑲白旗漢軍都統十二月

命仍赴藏辦事傳清亦復往十五年九月擢都察院左
都御史時珠爾默特那木扎勒謀叛拉布敦與傳
清決計先翦除十月十三日召至通司岡公署數
其罪誅之逆黨羅卜藏扎什糾衆肆逆二人同時

遇害事詳傳青傳總督策楞以

聞

上軫悼

諭獎其奮不顧身忠誠卓越心甚苦而功甚大贈一等

伯入祀賢良昭忠二祠

恩授一等子爵世襲罔替初拉布敷族隸鑲紅旗至是
命入正黃旗十六年

命立祠通司岡樞至京

上親臨奠醑

賞治喪銀萬兩仍

賜祭葬如例諡壯果并

特建雙忠祠祀之嗣子隆保襲世爵

欽定八旗通志卷一百五十二

欽定四庫全書

欽定八旗通志卷一百五十三

人物志三十三

大臣傳十九

滿洲正黃旗七
海望 碩色

喀爾吉善

嵩壽

喀爾吉善

子定長

喀爾吉善滿洲正黃旗人姓伊爾根覺羅祖喀齊
蘭官副都統有傳父凱音布初襲其祖克宜福所
遺三等輕車都尉世職康熙十年授御史兼世管

佐領二十六年擢光祿寺卿累遷吏部侍郎三十一年改漢軍正黃旗副都統三十三年調滿洲正黃旗副都統三十九年授禮部侍郎

命偕學士碩穆布赴廣東查審雷瓊道成泰慎遊擊詹伯豸擾黎激變事得實論罪如律四十年擢戶部尚書四十

五年調禮部尚書四十七年以老病致仕雍正元年卒

賜祭葬如例喀爾吉善降襲騎都尉授上駟院員外郎充

游墅闕監督雍正九年正月遷郎中三月調工部

仍兼上駟院行走五年襲世管佐領七年以前偕
通政使留保會鞠廣東署知州揚以寧勒索耗穀
案誤擬罪部議革職得

旨從寬留任尋

予開復八年擢兵部額外侍郎九年授左侍郎十年充八
旗通志館副總裁十三年三月以驗馬不實議革
職留任六月

詔革任九月

命往盛京收糧乾隆元年三月奉

旨仍留佐領五月以廢員引

見

命管理圓明園八旗兵丁九月復往

盛京收糧十二月奏言向來八旗臺站兵二八月於

中江與朝鮮人貿易每減價勒買牛或藉索海參

請嚴禁

諭曰朕思八旗臺站官兵有看守巡查之責原無暇貿

易且亦不諳貿易之事嗣後著改令內地商民與朝鮮貿易中江稅官實力稽查務均平交易毋得勒措滋擾三年五月擢內閣學士七月遷戶部左侍郎協辦步軍統領衙門刑名事務十二月調吏部左侍郎四年兼管三庫事務五年閏六月授山西巡撫六年正月疏言晉省各屬自理贓贖銀向來有詳報上司者亦有因公動用無案可稽者請令按季冊報二月又言汾水經太原府城西舊有土堤卑

薄每夏山水驟發城郭堪虞應培堅厚並於頂衝
處隨時搶護

詔均如所請三月疏劾布政使薩哈諒貪婪及學政喀
爾欽納賄營私各款

命侍郎楊嗣璟往會鞠得實論罪如律

諭曰此二案朕先有訪聞降旨詢問喀爾吉善不能隱
匿始行叅奏著該部嚴議尋議革職

上念其到任未久

詔從寬留任八月疏言晉省偶遇水旱米價輒騰貴請
令各屬照時價及時平買從之九月疏劾河東鹽
政白起圖貪鄙婪索白起圖亦以喀爾吉善挾私

誣叅奏辯

命副都統塞楞額往鞫論白起圖罪如律十二月疏言
煤為兵民日用必需口外更資禦寒歸化城等處
駐滿洲兵商民輳集附近無薪可採請多開煤窰
仍禁內地煤出口杜帶禁物之弊下部議行七年

三月疏言歸化城土默特蒙古不諳耕種以地典
給民人生計窘迫請將民人所輸銀徵解將軍分
給蒙古用度如尚有可耕地一體招民墾種大學
士等議行十二月調安徽巡撫八年三月調山東
巡撫六月疏言本年東省雨澤愆期秋成失望民
人多外出謀生而鄰省貧民亦有轉入東省覓食
者請飭地方官勸令各回故土以待本處自有之
恩

諭曰所見甚為得體各省督撫須當留心於平居無事之時委曲開導使知敦本務實力田逢年若輕棄其鄉則本業拋荒失所依倚即國家收養資送亦不得已之計非可恃為長策也七月又言濟武東三府屬遇旱濟東有漕運又有府倉及臨德二倉存穀緩急可相通惟武定無倉請於登萊二府倉撥運接濟九月又言倉糧買補貴有權衡濟武東三府屬現辦災賑倉穀請暫停買還其豐收價平處令及時

買補

上是之九年二月疏言春月糧價騰貴貧民艱食請酌量減糶三月又言東省兵米例係按季本折魚支春季青黃不接米價昂兵支折色秋收米價平減轉支本色請以春秋二季本折互換又德州海豐惠民樂陵各州縣應修城以工代賑及時舉行四月又言濟武二屬麥秋復被旱災現雖賑借糶三者兼行而繼此亦宜廣籌請飭各州縣於豐收之

曹沂等府採買接濟並請於豫省沿河州縣麥收
豐稔處量為採買運貯五月請於司庫借支一季
餉銀給濟武營兵於冬季為始分四季扣還以紓
兵困均得

旨嘉允先是有直隸藁城縣知縣高葑者山東人請試開
臨淄即墨平陰泰安沂費滕嶧等縣山場銀銅鉛
鐵各礦事下山東巡撫勘奏至是喀爾吉善奏言
神京拱衛礦洞久經封禁東省其地跨四府八縣形

勢遠近睽屬開採殊多未便且利之所在衆必共趨恐濟武災區沂曹盜藪別生事端應照舊封禁

上諭其言十年二月

諭曰前因外省兵糧缺出惟馬糧係督撫提鎮親行拔補至步糧則由營員驗放往往徇情市惠濫行收錄虛糜糧餉曾降旨令直省督撫提鎮親自驗放今據喀爾吉善奏稱東省各營碁布星羅散處十郡若概送提鎮衙門考拔不惟道路跋涉且恐久懸名缺請

嗣後將臣標所屬二營登州鎮屬濟南城守一營及附近省城之大小營汛遇有兵丁缺出臣俱親加考拔其登充鎮臣均照此辦理至副將乃武職大員其同城本營及附近營汛之兵丁亦即飭令該將慎重選拔秉公驗放仍造冊呈報提鎮於按年巡視各營時照冊查對此奏亦屬有見著照所請行並通諭各省督撫提鎮知之十二月以幕友吳芳猷掣選廣東縣丞疏請留東補用為御史張孝程所糾

諭曰張孝捏奏稱喀爾吉善身為大臣嫌疑俱不必避
則當咨部銓選何必竟以留東奏請而於吳芳猷掣
選廣東遠省始起辦公需人之見難免規避此奏亦
是吳芳猷著仍補廣東原缺十一年九月遷閩浙總

督十一月

命開復前草職留任案十二年五月疏言臺灣漢民流
寓日衆匪類肆竊更有闖棍惡徒恣行不法請嗣
後竊案計贓在徒罪以下並眷屬在臺者初犯刺

臂責懲交屬收管再犯則刺面按律治罪并眷屬
逐回內地安置其闖棍擾害地方者審明治罪無
論有無眷屬概行逐回仍行知原籍地方官交保
鄰族正管束不許私渡過臺六月又言臺灣地狹
民稠奸偽百出請自本年五月為始定限一年在
臺民人迎取家眷及的屬欲往就養者確查給照
過臺仍飭內外汛口員弁詳察愈限不准給照

詔均如所請尋偕巡撫陳大受合疏言閩省倉穀出陳

易新不難於出糶而難於買補春夏碾米給兵秋
冬民間碾米完納官又易穀補倉事多周折不若
即令糧戶交穀官民兩便從之七月議覆浙江處
州總兵苗國琮儲材備用一疏言閩浙戰船桅木
非巨材不可若如國琮所奏於無稅官山種樹令
地方官培養則須先發工本未免糜帑且必百十
餘年始中繩墨恐日久稽查匪易不若許民自種
納課種樹之初得收花息成材之後仍給價值民

視為己業培護自勤在官不費經營而良材可獲
實用下部議行九月疏劾浙江巡撫常安貪婪各

款

命大學士訥親往鞫得實論罪如律十三年四月

諭曰閩浙總督喀爾吉善鎮靜和平練習吏治其叅奏

常安一事不以同官稍為隱護公直可嘉乃督撫中

所少者斯實不負朕倚任之意着加太子少保十四

年二月偕巡撫潘思榘條奏海防三事一內地民

往來外洋勾結滋事應令保甲族長於編查門牌時將戶內所有往販外洋之人或為舵水或為客商逐一登明倘久客不歸及倏來倏去形迹可疑並外番人往來其家即報明詳究一洋船舵水人等給照時應逐名親驗即客商跟役亦親驗取結至出口如有更易許船戶呈明守口各員於總照內填註不能遠赴原籍取結者即取其行保及同船客商切結俟入口時驗明原照方准回籍一洋

船回棹之六七八九等月及出行之十二正二三等月責沿海汛弁兵丁晝夜巡查渡載外洋人貨者以私越論

諭實力行之又言福寧府屬之寧德縣舊有東湖地勢平行與海通宋元泊明失修臣諭守令等察形勢土性導士民輸貲合築撥世業以出資輕重定分地多寡堤成酌定年限照例分別升科雖國家增賦無多民食實有攸賴

諭曰勸課農桑興修水利正務本之圖也欣悅覽之十

五年加兵部尚書銜十六年三月

上南巡

恩免江南積逋二百餘萬而浙省向無逋欠亦

特蠲本年正賦三十萬兩

獎賜喀爾吉善詩曰巡吳於越便中過恐誤農桑候正

和完賦自緣民俗美不須重勉善催科七月疏言浙

省溫台一帶被旱儲積空虛應自閩撥運臺穀接

濟但重洋往返需日一面先撥廈門廳及莆田縣
倉由廈門乘南風運往所撥臺灣穀至廈門就近
歸還至臺灣備貯穀亦應及時買補無俟溫台解
還糶價即先借款於秋成收買得

旨嘉允十七年二月以浙江巡撫永貴辦賑乖謬喀爾
吉善不能匡正且附和部議草職

詔從寬留任七月又以失察司庫吏侵冒帑項議革任
仍

詔免十月奏年老懇回京供職

溫諭慰留又奏閩省產米穀少向來採買俱預先公平

給價與各省買自市集徒昂市價者不同本年豐

收宜收買儲備請將現存倉穀不足五分者買足

即已足五分而本地穀價平減亦動支原存糶價

買補又閩省山險就本省通融撥運無庸赴隣省

採買

上是之十八年正月以督撫福建漳州奸民蔡榮祖等

迅合機宜

諭部議叙加一級十九年四月加太子太保閏四月條
奏更改浙省海塘六事一南北兩岸工程各不相
及海防道員宜裁北岸仁和海寧海鹽平湖四縣
塘工歸杭嘉湖道轄南岸蕭山山陰會稽三縣塘工
歸寧紹台道轄各增養廉銀五百兩一海防同
知通判宜更定分管之界北岸土石柴塘鞏固無
事興築八仙石至戴家石橋歸西防同知戴家石

橋至談仙嶺歸東防同知談仙嶺至江南金山界
歸乍浦同知統聽杭嘉湖道轄南岸塘工向係紹
興府通判兼管究非專員應將北岸通判改為南
塘移駐紹興府之三江城聽寧紹台道轄一塘兵
宜改堡夫海防營額兵一千內有僅諳修防不習
技藝者應挑出四百名作為堡夫照南河例在堡
看守堡房其錢糧於裁撤兵餉內動撥一裁撤之
兵宜分撥杭乍兩營海防額兵一千內既改堡夫

四百再將諳曉技藝者撥入杭協城守營二百諳
曉水務者撥入乍浦水師營一百餘均裁汰或歸
農或補附近各營缺額一杭乍兩營宜增設備弁
杭協城守營僅一都司應將海防左營守備改為杭
協城守營中軍守備乍浦水師應分左右兩營將
原設守備改為左營海防右營守備改為乍浦右
營其千把總外委各員分別酌撥一官兵裁剩經
費宜歸併塘工備用海塘每年額設引費萬餘兩

備歲修不敷仍題動正項今官兵既撤節省各項
銀應歸入海塘經費項下遇有工程無須復動正
項部議從之先是

上以八旗生齒日繁

恩許京城漢軍人等改歸民籍各謀生計各省駐防漢
軍一體推行所遺缺卽派京城滿洲兵往補

命喀爾吉善會同福州將軍新柱籌議七月會奏應辦
事宜六條一願為民之漢軍無論世族間散准入

民籍一願為民而別無生計惟藉糧餉贍養者分
派近省綠營坐補糧缺一漢軍甲兵儘馬甲先改
一半以便滿洲兵坐補一漢軍原住房產均留給新
派滿洲兵一暫留漢軍水師兵令滿洲兵漸次學
習頂補一派出京城滿洲兵應分次分路行走又
言福州駐防兵既改滿洲則協叅防校等缺應改
用滿洲人員請於八旗滿洲現任佐領以下等官
及隨旗世職內揀發來閩與漢軍人員交代任事

大學士等議行二十一年以查審前任浙江巡撫鄂樂舜勒派鹽商銀一索論擬失實部議草任

詔寬免尋奏浙江省海塘為杭嘉紹三府田廬攸關年來水勢南趨北塘鞏固南岸紹興所屬尤險請於宋家樓楊樹下一帶照海寧魚鱗條石等塘建石塘四百丈其平穩處接築土塘二十丈塘後幫築土戲以護塘身其原有之土塘及鑲修之柴塘留資外護不致頻修糜費如所請行二十二年二月

上南巡時喀爾吉善子定長任貴州巡撫

賜喀爾吉善詩曰海疆澤國久聲騰坐鎮宣風嘉汝能

連率威儀今陶侃一家父子昔韓宏行春惠化吾方

覽作兩平章民久稱供頓何須事華飾山川韶秀此

邦勝七月

諭曰喀爾吉善奏現患疽疾不能視事將關防暫交將

軍新柱護理披閱之下深為軫念着太醫院派外科

一員令其子員外郎定敏帶同馳驛前往診視並加

賞人獲一觔以為藥餌之用仍傳諭喀爾吉善伊年
老被病不妨寬以時日從容調理全愈後再行視事
不必遽請解任副朕優眷至意是月喀爾吉善卒遺

疏入

諭曰閩浙總督喀爾吉善品行端重練老成久任封
疆勤勞懋著前聞偶患熱疽特命伊子定敏同御醫
馳驛前往診視並賜葭餌以冀速痊乃計程尚未到
閩遽爾溘逝朕心深切軫悼喀爾吉善着入祀賢良

祠以昭眷念賢臣之意應得卹典該部察例具奏尋
賜祭葬如例謚莊恪長子定長由監生於雍正十三年
授內閣中書乾隆三年遷侍讀五年襲世管佐領
九年授江南徐州府知府十二年遷淮徐道十三
年遷山東按察使十四年遷陝西布政使十五年
擢安徽巡撫十六年調廣西巡撫十七年調山西
巡撫十八年三月調署貴州巡撫九月實授十一
月條奏武科不許本省文武官員子弟頂食名糧

應試又奏現經調任湖廣總督永常條奏鄰省會
哨事宜奉

旨籌議臣查貴州與鄰省睽界幽僻之地苗夷環處從
前未加兵威若與鄰省酌辦會哨雖不必張皇其
事而苗性多猜保無別生事端應請停止大學士
等均議如所請十二月疏劾提督丁士傑以書囑

調知縣馬中驥

上嘉定長據實陳奏持正得體降士傑為廣西左江鎮

總兵十九年九月請以節省棚馬公費銀交地方
官平價買穀借給撫標兩營兵以資接濟又言黎
平府屬之古州城東北江水泛漲為患乾隆九年
城北已築石隄而城東未及興舉請接築報

聞二十年四月題請原任黔西州知州黃秉忠入祀名
宦

諭曰定長此本甚屬錯謬黃秉忠乃黃廷桂之父計其
宦黔以來六十餘載該州士民身親見之者尚餘幾

人今日之合詞呈請豈出輿情公論且果有遺愛在
人何以久未題達明係因黃廷桂現任總督且又與
伊貴州連界瞻徇市惠耳定長著嚴加議處尋議降

二級調用

詔革職從寬留任二十一年疏言本年雲南廠運銅愆
期黔省積銅現足供鑄應通融籌辦請將上年所
買滇銅五十萬觔停運來黔先儘解京備用得

旨嘉允二十二年二月

上南巡定長請入

覲

命便道至浙省其父喀爾吉善

賜詩曰迎鑿當入覲述職並寧親此意原嘉爾推恩詎

一人西南門戶固禮樂獐苗新撫遠惟安靜庶因福

及民五月

諭偕尚書劉統勳往鞠雲貴總督恒文勒屬買金短價

及縱容家人收門禮一案得實論罪如律即署雲

貴總督六月調山西巡撫未赴尋丁父憂十一月授副都統銜

命赴西路軍營督辦屯田二十三年以委員擒賊未獲部議草任

命以現在品級仍留屯所辦事二十五年補兵部右侍郎二十六年授福建巡撫二十七年疏言常平額穀例原借糶兼行應於青黃不接時先儘積貯甯久之穀定價出糶秋成買補農民願借者聽

詔如所請二十九年三月請移泉州府西倉同知駐就
近之石獅街又言新例禁絲出洋絲價低昂總視
蠶事豐嗇徒禁出洋無益請照舊弛禁從之七月
以提督黃仕簡叅奏總督巡撫收受廈門洋行陋
規事解任尋

諭曰前以此案關係督撫婪索多贓因命舒赫德等前
往查辦今所奏既無確據定長發價購物亦沿習舊
例初無不可輕貸之處著從寬仍留原任十月疏言

閩省常平倉穀較他省數本充裕而逐年收捐監穀額貯益增現值平糶時請以積存溢穀遇應行買補各邑一水可達者通融抵補不必糶價解司

上嘉允之三十一年二月遷湖廣總督十月疏言緝匪惟在地方文武員弁認真留意申明賞罰楚省各屬現派眼目不下七十餘名徒多無益應概撤

上是其言先是湖南桂陽州民侯七郎毆斃大功服兄侯嶽添知州張宏燧誤以七郎之親兄學添為正

允按察使宮兆麟駁審宏燧護原招稟辦布政使
赫昇額力庇宏燧讞久不決至是事發

命侍郎期成額往會定長嚴鞫得宏燧及赫昇額執拘
黨庇狀均請革職

上以赫昇額身任藩司命案非其專責何以偏袒宏燧
必別有結交情弊

諭再研鞫三十二年正月究出前任巡撫李因培與赫
昇額曾授意宏燧為己革武陵縣馮其柘彌補虧

缺事因培赫昇額宏燧其柘均擬斬如律二月部
議定長失察應草任

詔免四月疏言雲南現在用兵需人造船廷議於湖南
水師營內選送查向來水師營船係雇工成造今
雲南需船孔亟若僅於水師營內選送恐有貽誤
現飛飭洞庭協及岳州營儘數發往仍於巴陵覓
諳練工匠續送六月以濫用竹兕送過境兵役議
草任仍

詔免三十三年卒

諭部議卹三十四年署總督高晉奏荊州副都統石亮
老病請勅休

諭曰石亮衰庸應棧已非一日定長在任時豈竟毫無
聞見而一味姑容徇庇其膜視公務不問可知前此
朕念其平日尚屬勤慎降旨加恩予恤今觀其闕茸
若此卹典應即勅部停止使封疆大臣知不實心奉
公之咎雖身後已遯寬典亦當亟行追止以示懲創

定長長子台布襲騎都尉曾任乾清門侍衛次子
台斐音現官山海關副都統

嵩壽

嵩壽滿洲正黃旗人大學士希福曾孫由雍正元
年進士改庶吉士散館授編修十二年充

日講起居注官遷侍講十三年十月

命在尚書房行走乾隆元年六月轉侍讀七月充山西
鄉試副考官十月同正考官侍講鄒升恒疏言京

闈鄉會試向設內簾監試稽察一切并點放水菜
外省則皆主考兼理請照京闈例增設監試又墨
卷違式例應貼出但如抬頭點畫草葉偶有錯落
小誤無關弊竇請嗣後免貼下部議行二年四月
冊封安南國王黎維禕嵩壽充正使

賜一品服三年四月還京授陝西學政九月擢詹事留
學政任四年疏言向例歲科兩試摘士子所習本
經令默寫於四書經藝之後恐士子徒事記誦不

究經義請於四書經藝外令作經義一段其不能
講解及背經旨者生員不列優等童生入學不列
前茅再童生有背誦五經兼能講解者書藝平通
亦量取以示鼓勵

詔如所請五年遷大理寺卿六年十二月授安徽學政
八年六月調陝西學政十二月疏言府州考試童
生本署向無考棚號舍無從編號諸弊易生查學
政考棚多設府州本城且考試必在學臣未按臨

之先號舍卓椽俱備請府州即就學棚編號局試
間有學棚設於屬縣者赴屬縣考試倘因公事不
能往亦就近擇緊密公所編號嚴防部議從之是
月丁父憂十三年授左副都御史尋遷內閣學士
十四年頒

詔朝鮮還擢禮部右侍郎

尚書房行走十五年兼漢軍鑲白旗副都統調鑲黃
旗充順天鄉試副考官及武鄉試正考官十七年

命為經筵講官尋充會試副考官十八年復典順天文
武鄉試先是希福所立三等子爵長子奇塔特孫
費揚古曾孫來仙雯蔚相繼襲十九年雯蔚卒嵩
壽襲之二十年卒

賜祭一次孫增保襲子爵任頭等侍衛

海望

海望滿洲正黃旗人姓烏雅雍正元年由護軍校
授內務府主事尋遷員外郎二年

賜戴孔雀翎四年遷郎中八年六月擢總管內務府大臣

九月管理戶部三庫

賜二品頂戴尋偕兩江總督高其倬相度太平峪

萬年吉地得

旨嘉獎議叙加二級九年七月遷戶部左侍郎仍兼管內

務府事八月授內大臣十一年正月

命偕直隸總督李衛勘浙江海塘先是總督程元章奏海

寧縣潮勢自東而西侵仁和縣界石草各塘坍塌

勢甚危險大學士等請

特簡大臣通盤籌畫以垂久遠故有是

命四月海望等疏言浙省江海情形門戶有三省城東南

龔緒兩山間曰南大鹽禪機河莊兩山間曰中小

鹽河莊山北海寧塘南曰北大鹽謂之三鹽南大

鹽久淤成陸數十年前水由中小鹽出入後漸徙

北大鹽年來桑田廬舍已成滄海若欲遏江海之

狂瀾仍歸中道恐非人力能為查海寧東南有尖

山聳峙鎮鎖海口其西有小山俗名塌山相去百餘丈今江水大溜緊貼北塘直趨尖山塌山之間而海潮激塘護沙日刷若俟冬初水落建石壩堵塞使江水海潮仍向外行則北岸護沙可望復漲至仁和海寧海塘自華家街以東尖山以西有草塘條石塘塊石塘各工草塘易朽塊石塘亦易坍應改建大石塘並於海塘內增築土條塘一道庶可衛護民生咸成樂土

諭

曰所議俱屬妥協着交部照所奏行朕思尖塌兩山之
間建立石壩以堵水勢似類挑水壩之意所見固是若
再於中小疊開引河一道分江流入海以減水勢似更
有益從前雖經開挑旋復壅塞者皆因惜費省工之故
今若加工開濬兩工並舉更覺妥備石壩建後即有漲
沙而石塘亦可漸次改建以為永久之利著程元章等
相度遵辦是月海望等又奏海塘四事一管工人工
竣日分別議叙一工價銀米兼發於米賤之地買

運搭放一增設海防兵備道一總轄塘工同知一
與舊設二員分轄守備二兵一千備調遣一新設
道員駐海寧同知駐仁和守備分駐海寧東西分
防塘汛部議如所請八月又言從前塘工未固由
監修之員每多草率所致請

勅浙江駐防將軍副都統就近選派旗員協同監修
從之十三年振武將軍傅爾丹虐兵婪索事發

命海望赴北路軍營拏解來京治罪八月

今上御極

命在總理處協同辦事署戶部尚書九月

諭曰海望前自北路軍營回京時奏稱鄂爾坤發遣人
犯在彼種地並無實濟且恐日久之後人數漸多致
生事端似應改發他處彼時

皇考以鄂爾坤現有大兵駐劄豈有不能彈壓之理此奏
不合曾經降

旨教導今總理事務王大臣及辦理軍機大臣等議覆此

事並無定議之語殊有觀望之心及朕降旨諭令再議而王大臣等仍復游移其說介在兩歧是王大臣等尚未知

皇考聖意也朕伏思

皇考之意蓋以此等發遣之犯原係身獲重罪之人今發往軍前種地者乃保全之大恩令其効力贖罪耳若其中果有情罪冤抑不應發往者乃辦理刑名大臣之錯誤自應聲明具奏寬釋其罪方於情理允協若

本無冤抑之情只因其不善開墾遂爾改發內地以兵丁代之是獲罪重犯又不肯急公趨事轉得遂其僥倖之心且兵丁等平時職業惟在騎射當差耕種之事非其所素習若以不能力田為辭則將遷移內地之民往耕邊塞之地乎此事之斷不可行者若以此地不應聚積多人則將嗣後發遣之犯改發他處尚屬可行似此已發之犯豈有更改他處之理且無論大軍在彼儘足彈壓即彼處無兵亦毫無可慮者

若以伊等不能耕種則自應令該將軍大臣等嚴加督率定為賞罰之條以示懲勸况耕種本非難事非工作技藝之可比若肯用力人人能之其所以苟且因循未收實效者皆該管官員疎忽怠玩之所致也海望心地純良但識見平常且有固執已見之處伊所陳奏豈可盡以為是爾等之意想以朕降特旨將海望署理戶部尚書且不時召見遂起觀望之心將

伊陳奏之事向奉

皇考中飭仍復含糊議覆甚屬不合向後當以此為戒十月授戶部尚書兼議政大臣疏言大兵現駐防鄂爾坤官駝數萬若以給臺站蒙古等令其運米則運價大省於蒙古生計亦有裨益王大臣等議如所請乾隆二年四月

秦陵工竣奉

旨優叙給雲騎尉世職十二月因總理事務議叙復給一雲騎尉四年晉太子少保六年二月請停各省

捐穀例

諭曰從前停止各項捐納之時在廷諸臣及翰詹科道等議留捐監一條俾各處積穀以備民間荒歉之需且使士子廣其應試之路洵為兩便並非捐官可比朕已先行昨據御史趙青藜請停止捐監又經大學士九卿會議以為事屬難行應仍其舊朕已降依議之旨矣今據海望奏稱外省收捐繁難赴捐之人甚少原議各省捐貯穀數共應三千餘萬石今報部者

僅二百五十餘萬石合計尚不足十分之一不若傳止各省之捐穀仍照九卿原議在部交銀將所收之銀扣抵各省買穀銀款俟倉貯充盈之後將應停止之處再行請旨朕思納粟貯倉原為備荒發賑預為籌畫之計外省捐穀繁難且有弊竇不若在部投捐之易誠如海望所奏朕亦知之嗣後仍准在部收捐折色至於外省收捐本色之例亦不必停在内在外悉聽士民之便地方積穀不厭其多賑卹加恩亦所

時有正未易言倉貯充盈也先是海望為郎中時充
崇文門監督洎擢尚書每任滿

命管理如初至是御史胡定疏陳關稅浮徵事言崇文
門貨物上稅有掛錘頂秤名目每百觔必作百四
五十觔稅額雖未明增實已加至半倍其零星貨
物由各門入者任意需索更有數倍於稅額者至
外省各關如杭州北新關自南而北不過十餘里
盤查共有七處雖無貨客商必索飯錢多方留難

有貨者應納之稅不過數分而入口給票出口繳
票之費七次苛索竟什百於零星貨物所值之數
推原其故蓋由管關之員務欲所解稅課盈餘浮
於舊額以免部駁而見己長吏胥巡攔藉得恣睢
無忌請嚴禁

諭曰關差一項從前司稅之人歸之私索者後令報出
即為盈餘耳並非現徵之外有所增加也雖管關
之人賢愚不一或有奉行不善欲增課以見長因而需

索累民者然此十之二三耳較之未經澄清以前已覺減少者蓋多矣朕臨御以來又復核減稅課不下數十萬兩且不時嚴飭該管諸臣剔除諸弊至再至三今條奏關稅者尚屬紛紛如海望係

皇考及朕簡用之大臣豈不知國體而但知言利者比其管理崇文門稅務不過儘收儘解盡行報官不似先前之入私索因而見其獨多耳朕即另派大臣管理想亦如其數也若如胡定所奏苛索種種朕可以信

其必無何為如此過甚之詞耶崇文門稅務不必另議至外省關課皆久經該督撫就近稽查除現設口岸報部有案者照舊設立外其有私增口岸逐一詳查題報應留者留應革者革此番清查之後司權之員若再有違例苛索者胥役嚴處官吏嚴叅該督撫不行查察經朕訪聞必於該督撫是問至浙墅北新二處係江浙大關尤為緊要著交兩江總督楊超曾浙閩總督德沛照此稽查辦理十二月海望調禮部

尚書兼管樂部太常寺鴻臚寺事十三年署戶部
尚書十四年調戶部尚書十七年四月與侍郎三
和等遵

旨查奏

兩郊壇宇工程所發物料銀過多自請嚴議六月議革職
詔從寬留任十九年以前在侍郎任內承審鹽商王惠
民匿課行私一案誤以未完作完議革職

詔留任二十年卒

諭曰戶部尚書海望老成敬慎辦事實心宣力有年勤勞懋著昨患痰症亟賜醫藥尚冀痊可遽聞溘逝朕心深為悼惜著賞銀二千兩治喪遣散秩大臣博爾本查帶領侍衛往奠茶酒應得卹典該部察例具奏

尋

賜祭葬如例謚勤恪

碩色

碩色滿洲正黃旗人姓烏雅雍正元年由候補小

京官授戶部主事尋遷員外郎五年擢西安按察使兼河東鹽政六年疏言河東鹽池向例撥額引羨餘銀五千兩歲修渠堰而池牆不入歲修請於添設餘引羨餘內歲撥六千兩以三千兩歲修池牆以三千兩貯運庫為五年大修用此等工程運同不能兼理請揀附近州縣五六員監修疏入下部議行七年

上命偕提督岳鍾琪巡撫西林鞠逆犯曾靜之徒張熙詭

名投書案得寶九卿擬罪如律八年遷西安布政使十一年擢陝西巡撫乾隆二年調四川巡撫九月碩色疏報川省陋例相沿火耗羨餘外銀百兩提解六錢名曰平餘充各衙門公用

諭曰川省耗羨向因公用不敷每兩完銀二錢五分朕御極以來加惠閭閻減去一錢止存一五之數欲使民力寬餘受國家休養之澤也今據碩色奏不勝駭異火耗報官原以杜貪官汙吏之風若耗外仍聽其

提解非小民又添一交納之項乎一項如此別項可知一省如此他省可知朕思此等浮多之費取之商民層層剝削其數必不止此難免地方擾累著碩色永行革除以杜官吏借端需索之弊倘公用有必不可少之項著於存公耗羨內支給報銷三年碩色同川陝總督查郎阿提督王進昌合疏言郭羅克番人數年來結隊行劫向設把總一兵二十不能防範請於附近標協酌委都司守備一員領千把總

各一兵二百按年輪班駐劄彈壓廷議如所請又
條奏駐防郭羅克事宜一運郭羅克軍糈道路崎
嶇腳價不敷請一夫負米五斗每站給價一錢口
糧按季運交營員支放每石耗米三升作正報銷
一松潘至郭羅克二十二站皆屬番地軍糈委於
佐雜不無可慮應派千把總一輪班押運一出口
馬步兵二給馱馬一例折銀八兩每鞍屨折銀六
錢五分均於松潘廳庫支給一郭羅克霜雪不時

自守備以下須製皮衣請守備一員借銀一百兩
千把總二每員四十兩外委千把總二每員十二
兩馬兵十八每名六兩步兵一百八十每名四兩
亦於松潘廳庫動支部議皆如所請四年調山東
巡撫五年六月

諭曰朕五月間聞山東郟城至蒙陰俱成赤地上年被
灾地方官不實心辦理民人逃往鄰省者甚多以致
拋荒故土未曾耕種兩月來碩色未將雨水情形奏

聞巡撫身任封疆應辦之事孰有大於此者特降旨
詢問之據碩色奏郟城蘭山蒙陰三縣連歲歉收是
以流移獨多經臣奏明招徠回籍者二千二百餘口
而郟城一縣共收貧民一百七十戶大小五百八十
口俱已安插接濟並未拋荒故土至收成分數郟城
高阜地畝確有七分低窪地畝確有八九分蒙陰高
阜地畝確有七分低窪地畝確有九分今時雨疊降
秋禾遍野並徵赤地之說毫無確據等語朕覽奏稍

慰厪念今據左都御史陳世倌奏稱山東沂州府一帶數百里上年先旱後水二麥俱未播種流民散至湖廣江西者將及萬人湖廣送回饑民經過江寧揚州竟有搶奪之事及到山東碩色並不賑卹且以上年開報收成六分本年尚在徵比錢糧等語陳世倌此奏與碩色前奏迥然不同地方水旱災荒撫綏安輯乃封疆大吏之責碩色稍有人心何致粉飾蒙蔽至此著兵部侍郎阿里衮會都御史朱必塔馳駢詳勘

務期秉公據實不必絲毫瞻顧有灾荒應辦事宜一面辦理一面奏聞閏六月阿里衮疏稱臣等查勘沂州一帶雖非赤地二麥收成不過二三分至四五分而止六月前並未停征碩色奏殊失實七月

上以碩色才識不能開闔不宜大省前任四川地方情形尚係熟習調四川巡撫七年疏言重慶渝關木稅水漲則木筏順流而下一歲可得數年之木涸則已伐者積於深溝淺壑不能到渝自乾隆二年

部臣議以五千兩為歲額三年四年缺額三百餘兩經收各員屢以無力賠補為請五年水漲木多原額外贏餘至三千八百餘兩議全解贏餘請免額缺而部臣終格於行懇

恩豁免疏入

詔如所請八年調河南巡撫九月碩色子穆克德官光祿寺署正以民人爭地事寄字家奴囑其照應事覺碩色奏請草審

諭曰碩色因伊子干預外事據實叅奏甚屬可嘉此事尚在未行碩色自必嚴束其子不致滋事穆克德著革職交與伊父收管其餘人等亦著碩色就近外結下部議叙尋加一級十一月疏言前撫臣雅爾圖以豫民不知樽節酌為寄糧法與社倉一體出借每石亦收息一斗以五升為修倉鋪墊用以五升給原寄之人遇水旱聽領本回行未久有空報寄數穀不入倉者有呈報數多交倉無幾者有旋寄旋

領勉強輸納者有名無實請停勸寄專行社倉之
法疏入

上是之又言豫省存留漕穀勸捐社穀自乾隆元年至
七年借出未還者二十三萬四千四百餘石向以
災歉分年帶徵仰懇

聖恩免息止徵本穀

詔如所請先是戶部尚書訥親侍郎梁詩正請裁雍正
二年後續添新兵碩色議南陽鎮屬右營兵五十

汝寧營兵五十二歸德營兵四十二陝州營兵五十二信陽營兵三十五應裁汰餘新兵一百七十一名留資保衛河北鎮屬募新兵五百一十三已裁四百五十二僅存開封營六十一名差繁兵少應留供差防下部議行時河南按察使王丕烈疏稱河南地產小鹽四十斤以下照肩挑背負易米度日之例不必禁四十斤以上許本地籬筐挑賣外販者禁碩色議豫省鹽土煎淋即成土鹽礮土硝

土之底亦成土鹽名曰小鹽弛其禁則官鹽壅滯
奸商轉借引行私且產無定所出無定時未便招
商辦課若必稽查老少分別本境外境則巡緝者
非誣即縱請嗣後小鹽止許食用不得煎販照例
禁為便部議如所請十二月疏言豫省社穀責成
正副社長請於息穀十升內酌留一升以為正副
社長雜項之用疏入

上是之十一年碩色疏叅河南學政汪士鋁試文章拔

取縉紳子弟試武童不較馬箭止射步箭一士論
不服

上命戶部侍郎雅爾圖會審禡士銜職十三年三月山
東巡撫方觀承疏請北五省勸輸義倉

命碩色議因言社倉外更立義倉分捐穀石仍止此數
若儘捐義倉則社倉虛設且社倉散於春斂於秋
緩急可貸民猶樂從義倉止以備賑取甲散乙小
民心存爾我不能奉行轉滋勒指仍行社倉便得

旨如議十月擢兩廣總督十四年八月碩色疏叅左江鎮總兵楊剛交結田州土官岑宜棟違例放債

上命褫剛職擬罪如律十五年正月調雲貴總督七月廣東總督陳大受叅奏碩色任廣東總督時徇庇驛糧道明福婪贓各款

上以碩色素性柔懦諸事含糊屬員劣蹟一無覺察殊屬徇縱交部嚴加議處尋鐫三級留任十六年閏五月碩色疏報刑訊布政使宮爾勸多收銅斤案

上申諭曰碩色等奏到辦理宮爾勸一案甚屬舛謬前此傳諭令其嚴行查辦者因該督等奏宮爾勸先於出署之日暗行寄頓夫藩臬大員而懷狡詐鬼域伎倆則其侵欺屬實是以有即加刑訊亦不足惜之諭並非論實與不實必當夾訊也宮爾勸如果在廠多收銅觔婪贓肥己則有廠內歲入可以徹底清查而其囊篋亦必甚豐如不過沿習陋規及家人私收加秤則漁利甚微與郭振儀案等耳今據供只收歸公養

廉路耗銅劬俱已報解充公而其任所原籍貨產僅止此數已大概可知何用加之夾訊乎其奏內稱嚴加刑訊又稱刑訊再三茹刑不承徒辦成刻酷之形意謂奉旨刑訊無論虛實不敢不加之三木究之外省辦事祇應虛名雖滿紙張皇焉知非以套夾塞責轉使無知之輩謂將布政使用刑嚴訊乃因查追家產滋傳聞竊議之端碩色等如此辦理甚屬不知輕重著嚴行申飭此案宮爾勸究屬有無入已著再東

公詳晰分別另行定擬具奏尋宮爾勸以故縱侵盜
錢糧杖流如律六月疏言隆茂廠工丁聚至二三
萬人勢必流而為匪宜籌漸次解散之法其出入
隘口即在騰越雲州等處從此許入不許出禁其
續往則廠民漸少邊防得以寧謐疏入廷議如所
請七月疏言滇省各標鎮協營內設管隊頭目為
一隊之長向例本名糧外多食步守糧半分名曰
火糧并有佔全分者雍正十一年督臣尹繼善請

仍給隊目火糧半分所食空糧改養餘丁以充營
伍部議以名糧不宜虛佔概令招補餘丁尹繼善
復以隊長當差需費令給餘丁糧一分即其子弟
年未及歲亦准充補迨後日久弊生兵目成丁子
弟不願充補餘丁其充補餘丁者自八九歲至十
二三歲不等不能執械差操委屬有名無實請將
滇省餘丁三千二百餘名裁汰仍按原請火糧額
數先儘隊目精壯子弟充補如隊目無子弟親屬

即挑選招募補及原額於營伍汛防大有裨益疏
入廷議如所請二十一年調湖廣總督二十四年

九月卒於任

賜祭葬如例謚恭勤

欽定八旗通志卷一百五十三